

四庫全書

集部

欽定四庫全書

侯菴集卷二十三

元 李存 撰

哀辭祭文行狀

逢原湯先生哀辭

先生諱深字造道一字景文姓湯氏世為番易安仁人
宋尚書文清公漢其從兄也入國朝故家多零替先生
獨力學支柱傾壓書無所不讀尤長於詩歌不務為葩
華弄玩倨怪隅角往往肆而嚴槁而腴人讀之多淡口

不好也唯同郡黎君仲祥首稱賞之以為必傳嘗一遊
京師歷燕趙齊魯之墟然卒無相知者遂教授鄉里未
嘗一漫迹城市雖貧氣度恒恢如也姻友過從必百計
具酒食與盡歡乃已見童子亦渠渠謹至人有不善心
屏之如穢污晚乃甚好方士者術為符呪人有患難若
已有之至大元年九月得肺氣病存往候先生喜整巾
衣杖而出抱按謂存曰聞子好古文吾志之心久矣今
病不可以論幸而好當與子細熟之越七日竟卒存涕

泣曰嗟乎天之忌於成人之美如此哉先生二子及翁
昭翁皆才可不墜厥家將葬辭焉而哀之其辭曰

天之不造余以文兮使夫人而云亡冥車不可以返輓
兮奄日月之忽長聲歌奧窈以沛湃兮信彌晦其章夫
璵璠之在穴兮疇能閔草潤而木芳念未語之惘惘兮
知余心之可明雖道里之緬遠兮整吾駕乎隨以行指
玄圃與余兮將以攬瑤華之紫英羌茲志之不遂兮徒
茹恨而飲傷彼搃搃之猖昧兮厥僕而百償何夫人之

率履兮卒連蹇而靡涼抑高高者不可以諒兮抑士者
之所常矧二子之條特兮孰云委厥家而不揚重為悼
曰崇山之陌兮鬱松栢兮封三尺兮夫人之所
宅兮

兄申伯祭文

年月日弟存謹以酒果蔬食祭于亡兄申伯之靈兄雅
嗜酒弟存弗善也又樂試刀筆吏弟存並弗善也好言
止兄而弗得則切言怒兄也至或時不相歡知兄而早

世當何不順從乃志順從而非義見薄於君子也今而思之甚痛懷弗忍也前年兄告存曰吾能知昔所惑於是業加勤泛事益加不好存私心喜甚庶幾兄弟皆獲所成立共扶持門戶也當兄外病時存以為蒸濕所為無別苦只養胃湯一劑已鄔氏妹夫亦云然遂不謁醫明日坐起雖兄亦自謂不害不言歸又明日食已如廁反牀而終矣嗚呼抑固有定命非天枉耶抑亦謁醫更藥尚可貸其死耶是可恨而不可知也兄貌薄而頎然

善飯善行步日百里不為勤人咸謂辛苦人也而未嘗
有意其不年者也兄死大人日夜以悲七日而疾病亦
歷月而始安嗚呼天胡然忍而夭吾兄也兄胡然忍遂
棄其親使老不樂且病也存同胞上惟兄下鄔氏妹早
而失母兄弟又分處妹嫁而甚窮今則又重以死亡俾
不得相友愛啖菽藿以老嗚呼天哉何至甚耶兄之育
妻子也無他使令市米鹽藥食必身親之冒霜雪犯深
潦旦出而昏返顧不能需其一日之燕安於己不亦傷

哉興兒且教詩書若乃心志開通遂使之卒業庶慰荅
兄意不然薄田數畝俾耕耨而衣食焉振兒嘗挈而育
之又不奈其不能旦夕去嫂懷也快女未事於絲績且
留與嫂居待年擇人而嫁嗚呼弟存恆然而多病亦不
自知其足倚托否也姑盡其心力之所不至焉者天也

吳公行述

至正辛卯十有
二月甲申作

公諱復子字君陽初五代時由金陵遷廣信之弋陽宋
初始祖嗣自弋陽遷撫金谿之沙岡而八世祖濬復自

沙岡析居吳塘里曾大父諱堯仁大父諱士亨父諱德溥字時可幼與可孫同盱江雪樓程文憲公同郡草廬吳文正公從徽庵程先生讀書臨汝書院可孫登宋進士第為新昌尉時可於咸淳間以補試授登仕郎其卒也文憲銘其墓公生而端重謹厚性不嗜酒衣服不樂紉綺登仕且老畀以家政出納無毫髮私嘗曰人不我知惟天知之又曰人子之道亦何足以求人知也平居遇困窮無告必惻然憐恤之使有暴橫凌侮亦毅然不

少假借人有善必贊揚之不絕口有過失亦必委曲開導之又嘗曰通塞得失皆有定分非可以智力取亦非可以智力免宜一聽其自然人有假借不能償者亦不屑屑較汲汲求也使令有善於生息者委之而不疑愛之而弗移登仕公晚有末疾公旦夕不離左右藥餌必親熬煮飲食必親嘗而後進如是者八歷寒暑既而母余氏夫人年過耄耋氣力荅然必日假溫熱之劑以助而公以食指衆別室以居日必雞鳴至寢所進藥食而

退午如之晚又如之甚或夜分迺寐如是者又歷十二
寒暑也至順庚午大飢穀價數倍公獨平糶亦陰有以
律夫善騰踊者糶者日溢其門有偽稱公僕受其直而
潛糶者號呼求之弗得公詰之非詐從其失而償之至
遠近有貧弗能糶者亦輒施之無吝色其少時讀書多
苦無所通解中年嘗取浮屠言觀之大喜於是旁搜遍
覽無遺因自號止觀居士蓋取諸此由是嘗斂身正坐
反窺內察若有得者僕與公家有先世之好雖未嘗獲

承一日之雅而相聞甚稔他日偶過其季氏君錫家公
聞即來一見握手劇談其平生若釋氏明心見性之學方
士鍊形保氣之術亶亶不自休且曰吾嘗下豫章出彭
蠡浮錢塘渡江遊淮海經泗濱過大梁至于洛陽今雖老
尚欲北走京師歷齊楚燕趙之郊登泰山拜闕里入關求
周秦漢唐之故都望終南浮巴江過棧道出三峽順流
江漢以歸庶足以厭吾懷也公已六十餘察其氣甚壯
聽其言甚慷慨也僕雖歸亟尚謀與公卒談無何而以

計聞時至正庚寅二月一日也公生於至元戊寅春秋七十有三配同邑劉氏先五年卒子男二人某某孫男二人女三人將以明年辛卯十有二月甲申塋于里之石斛原某以僕粗知公請述其平生將藉以乞銘于立言之君子嘗謂吾黨之士苟無所事於當世則必得一丘一壑而足焉蓋其所存之齷齪者然耳今公之所生長有重岡疊嶂之環會清池百畝之渟涵有膏腴之田以為之食沃壤之土以為之蔬有第宅之美臺榭之觀可以釣

鮮而割肥可以息陰而坐石況數百年詩書禮樂之習
親賓之過從有壺觴之款師友之講明有絃誦之聲雖
使桃源輞川所圖畫者殆不多過公獨不為之懷且安
焉雖嘗僕僕萬里考形勝之跡求廢興之故以至於聖
賢之所過化羽人釋子之所栖息無不周知而悉覽而
猶以為未足欲一再往不遂而沒亦豈不足以窺其胷
中之磊磊浩浩者乎宜學士虞公有奇士之許也縉紳
先生樂道人之善其不靳於言也必矣

吳公君明行述

至正壬午良月乙巳作

公諱辰子字君明姓吳氏撫州金谿吳塘里人其家譜
先世居金陵五季之亂遷信之弋陽三山既而有諱嗣
者由三山遷撫金谿之沙岡其後有諱濬者復自沙岡
遷吳塘是為吳塘之別夫當時賢士大夫如汪公彥章
熊公彥時咸與厚善濬生邦祖邦祖生鄮皆篤學謹行
鄮生景立宋滕州僉判與琴山傅子雲為友僉判生堯
仁是為公之曾大父堯仁生士亨早從宜堂傅公維清

及華谷嚴先生槃遊是為公之大父士亨生德溥宋登仕郎少從徽菴程先生若庸遊與雲樓程文憲公鉅夫為同舍故其卒塋也文憲銘其墓是為公之父公賦性溫淳自小如成人稍長受詩於馮先生得一傳先生陽鳳既而復從其季父可孫教授盱江從謝先生元禮以卒其業事父母盡孝兄弟互出處膺門戶理家務惟恐毫髮貽其親之憂登仕公晚有末疾不良于行者八年侍奉惟謹比至卒癸克盡其禮母余氏夫人春秋八十

有二定省娛侍未嘗有懈歲時蒸嘗之際哀慕之色終身不衰時有菓蔬不薦不食兄弟六人屋比壤接善必相勉患必相恤闔門數百指舉無間言初伯兄屋子仲弟良子皆早世扶植其子俾克至于成立羣從子姪無不有以獎勉誘掖以進於善由是一族之內仁厚之風皆藹如也與人交率誠慤素不能強笑語以相容悅亦未嘗矜已之長以自誇人有一善則必稱揚不釋口有不善則必曲為諱護終亦不復言也雖待庸稚未嘗有

傲慢之意御童僕未嘗以疾聲厲色人有忤之者雖甚
不較苟有慶弔必躬親行之平居或賓親慶會率浣衣
濯冠生聚視昔有加亦為其所當為初朱嘗汲汲然也
有患難不能以自恤貧乏不能以自存必慨然拯濟之
人有假貸即與初不計其能償否也天厯己巳大饑明
年粟價騰踴公則減常值以糴由是數百里間爭歡趨
之至有為歌謠以紀其德偶有糴者饑不能前人攘其
金具以告公即以粟償之其人感謝而去時有司督糴

勸分之令方急奉令者或杜門不如約公盡發其私廩俾來者皆有所攜負雖嘗一浮長淮沂大江可以觀光上國然亦終卷懷而歸也義方之隆乃其家法科目之興也延明師以淑諸子子就試則欣然攜之以往而督其勤惰工拙焉及暮年環所居多種梅曰此花不負歲寒吾特愛之鄉里咸尊稱之為梅隱先生云因築別墅于故居之東為燕逸之地時婚嫁既畢二子亦自成立迎侍迭養公則幅巾野服無纖毫俗慮焉後至元己卯

七月廿一日以疾卒生宋咸淳丁卯享年七十有三配
余氏余氏竹心先生斗祥之女先公十有七年卒子二
人翼孫畢孫女五人長適同邑劉載陽後公一年卒次
適臨川王文明次養于伯姊家為余氏女次適饒安仁
倪文藻次適同邑劉天鳳先公十有四年卒孫男二樂
賢育賢孫女一人重娘將以至正壬午十有一月廿八
日葬諸大山塘翼孫以番易李某為通家者俾述公平
生之實乞銘於當世縉紳某辭不獲因嘆曰異時詩書

禮樂之家自革命以來降而為負販皂隸者甚不少吳氏之得姓受氏固遠而歷代有家有國者亦何限姑以其吳塘別祖而言自故宋至於今無慮三百餘載禮義之尚代不乏人詩書之聲不絕于耳及公之身雖經陵谷變遷之餘而世緒未嘗少有廢墜方此之時固有豪橫始克以自立而公則恂恂然鄒魯之風亦固有毫收髮計以自贏餘或不免瘠人以肥已而公則泊然於生聚之際人負於已則有已則未嘗少取于人又固有崛起

于一時我躬不閱而遑恤我後者而公則積累以至于
今若子若孫亦皆亶亶向善慕義而不已又固有醉于
詩書拘于禮義而不能免於貧約而公則博學洽聞而
財用自豐又固有因其貨利之交而與同室同氣為仇
讎者而公則兄弟子姪雖離啗啗和氣未嘗有與嗚呼
若公者亦可謂多享人世之吉福者矣然則非其善何
以及茲昔孔子生於成周之世猶曰善人吾不得而見
後漢馬少游曰吾得乘下澤車騎歟段馬使鄉里稱善

人足矣今公不言而躬行所自立者如此豈不得謂之善人乎哉宜乎天之所以報之者如是其備也縉紳先生雅成人之美其必不靳於一言

祭舅氏隆卧先生文

維至正六年歲次丙戌十有二月朔越某日甥番易李存謹以醵酒致祭於先舅氏隆卧先生吳公之靈而言曰存生五歲見棄於母思其容儀恍若無睹大父之沒適同其年屬纊深夜老猶記焉母疾滯下俗則忌避必

置他所是以不記後稍知書禮尚目瞿吾獨不然終天之苦念有二姨適饒與趙拜之亦遲不見其肖堂堂舅氏在江之西行李往來盜或奪而音問斷絕垂十餘載曾不百里如隔江海既及弱冠始造外家公一見之失喜誼譁面命耳提藹藹諄諄吾母雖死含笑厚坤數十年來道路晏如稍久不往必奉以書癸亥之冬先子棄世明年暮春公亦長逝訃音之來哀經走哭上天降罰何爾毒酷存有幼子頗近筆墨公有女孫亦出于側吾

母之神儼然猶在媒妁片言續此姻愛傍山之殯垂二十霜子克植立載闢土疆一坏未畢心熱顙泚茲得吉兆去家伊邇車有執紼丘有負土交游且來甥胡不與顧以僵仆大傷厥手將十閱月藥不絕口久晴忽陰酸楚滋甚勁風北來雪意凜凜顧此諸幼復卧瘡疹孰代其行益著不敏敬微酒薄敢告公靈雖缺於禮實將厥誠尚享

曾存心行實

乃大祐文
哲之祖也

公諱斗南字南叟姓曾氏世為撫州金谿縣眉山里人
曾大父諱次點大父諱洪父諱一鶚嘗從故宋宮講周
先生方習舉子業母陳氏二子公其仲也宋之季里寇
攘四起獨公奉父母徙避他所由是業頗蕩析既而內
附閭里咸安定則適奉雙親以歸躬督耕桑不懈且
示人以恩信未幾故物完復如初他日父母相繼沒公
執喪如禮卜宅兆于里之流光亭而乞銘於教授剡溪
戴公表元且築室墓側而題之曰衍慶觀度道士以守

之又他日忽曰吾豈局局於林谷者耶遂具舟浮彭蠡
遊長淮過淝江苟有勝境陳迹必登臨宿留而後去久
則浩然以歸延明師以淑其子若孫去家二里許有曰
萬石塘者羣山之所環羣水之所瀦也樂而營焉既完
則徙居之惟讀書賦詩種花菓來賓客以自娛暇則紗
帽竹杖逍遙乎山根水涯若無所與於世者嘗自別號
為存心處士云至正壬午十有一月八日晨起盥櫛如
常時忽痰作進藥却不飲顧左右曰吾其逝乎遂奄然

而卒宗戚交游相與哭于門鄉人之東西行者相與弔
于道無不曰是善人也今亡矣夫生宋開慶己未享年
八十有四娶同邑朱氏先二十一年卒子二人長元鎮
次元祐女三人長適同郡吳元相次適番禺上官拭皆
先卒次適番禺陳偉孫男三人紹祖繼祖興祖孫女一人
適番禺張溥曾孫男四人文觀憲恒曾孫女二人坤謙
以明年癸未十月五日葬蕭家源先塋之側從治命也
余嘗慕夫眉山曾氏之蕃且大及其里居之勝去年冬

始一過其鄉邈流而求其源杳然而深長奇峰秀嶂羅列左右嘉樹修竹往往而有石橋流泉曲折激清黝然而為魚池繚然而為墁牆老梅古桂夾道而植樓臺出蒼翠之杪雞犬聞烟霽之中使人顧望盤桓而不忍去因自謂曰亦何必武陵桃源哉宜乎有富家巨室世守之而其向來衣冠之盛猶可得而想見之也顧雖不及識公聞其居處素恭慎不飲酒不易言笑好惡無所偏蔽與人交泊如也雖高年益康強未嘗有疾苦耳聰目

明齒堅髮漆黑食啖如少年亦豈非其賦於天者獨厚而於已者每得其理耶昔漢馬少游曰吾得鄉里稱善人足矣顧公之平生謂非善人也耶今其子孫請述其槩將乞銘于立言君子圖以儀示其後來於無窮者不亦宜乎謹述

姜徑鞠先生行實

至正甲申閏二月望日作

姜之得姓固遠其有祿位功德於後世而蔓延於天下者尤不少其居饒州之安仁洪巖者按其家譜唐末有

虔嗣者守處州而家金陵會李昇據大江以南自號南唐虔嗣恥之棄其印綬而徙居於饒其後有念祖復徙安仁之洪巖五世孫興興生彥與彥與生伯正伯正生宏恢宏恢生應明字光淑實生公公諱遇文字景周幼而堅凝當郡縣方內附民未諳新政役往往隨以陪公獨能先後其長上出入城府或賦役之不均輒爭辨不已或奸狡之陵侮則理而致之法由是家以不墮母吳氏早卒繼陳氏性嚴厲克調娛無違禮者鄉閭是之大

德間別營于豐里內而燕室子舍外而賓館下及僕廝
食息之所以至厩廁樊牆道路皆井井不苟扁鐫則甚
嚴器皿則甚備也既完扁其堂曰容安購求古名書畫
不吝而度置之而為之目其先世得宋吳公傳朋為書
古栢行一卷及東澗湯公翰墨珍藏尤謹他日召其左
右而告之曰環是里皆壤土吾欲名恒豐里若何咸喜
曰唯公之命於是上官先生伯潤為之記復鑿池而魚
池之上種松栢數萬株築亭於中而扁曰成趣蓋亭之

外為園數畝培菊百本日徜徉其間人因稱徑鞠先生
云故宋平山曾先生為大書不一書之既久學士虞公
聞而嘉焉亦為賦詩有舊家渭上垂綸遠落日籬東把
酒同之句凡鄉之耆宿及遠近之聞人秀士皆敬友之
相過或與之觴詠或陳其書畫或徵其文辭以自樂予
且長則擇邑之名師篤教之如張君伯遠舒君元易吳
君尊光咸禮聘焉其田園山澤之入錢穀之生息冠昏
喪祭賦役賓客之費各有成規節不至苦用不至濫皇

慶間錦江倪公提舉江西儒學熟公之才且美也檄為
梅州梅谿書院山長會繼母喪不行時光叔年亦高歲
時奉觴上壽甚歡又他日自述其平生履歷難易以示
其子若孫而題之曰徑鞠老人傳厥後雖年高眼甚明
日用事毫髮無遺忘衣服食飲率浣濯粗糲不擇夜半
而寐雞鳴而起未嘗有倦容又凡所以事公上者甚謹
有役必躬先以率鄉黨蓋其老於人情世故者也至正
癸未五月二十有六日卒生宋咸淳丁卯享年七十有

七娶黃氏先四年卒子五人長均弱冠有能詩聲先二十又六年卒次坦次壩次坤次塹女一人適上官彬先二十又三年卒孫男四人鍾鈍鏐先祖孫女三人漸安柔珍咸安曾孫女一如玉將以至正四年某日築楚塘前事坦來請曰坦自童丱時見先人辱交執事今不幸至於大故惟先人之平生願有述也將藉以乞銘于當世搢紳庶先人其不朽乎予曰若汝之先君子者其持守其好尚其生殖其所以延續於前而垂衮於後者誠

可謂有立之君子也矣墓而有銘其誰曰不宜謹述如
右

厚峰先生吳公行述

至正己丑
九月作

公諱泰連字謂大姓吳氏其先金陵人徙信之弋陽既
又徙撫金谿之沙岡六世祖英州含光縣尉諱邦基復
徙今新田族大而蕃前代以明經詞賦由科第出仕者
相望也曾大父諱行世福州教授大父諱益太學進士
父諱可登仕郎漕貢進士季父諱名揚登進士第吉州

永豐縣尉見知於丞相文公天祥奏補禮兵部架閣公少而慷慨有志於當世未嘗以貧富介于其心每豁如也入國朝科舉雖廢而嘗自從諸老宿游讀書一過即記憶成誦詞賦援筆而成鄉校李攷每居前列經傳子史靡不周覽延祐間科舉復興歎曰吾荒落已久且老惟勗諸子以繼先業耳於是歲遣求從名師雖家無餘資而所以逢迎餽遺之禮不少怠既長又各遣其教授鄉里間以為教學相長之計歲時來歸則必攷其所業

訂其是非剖其疑難暮夜則張燈於堂命之環坐談論古今事未嘗少自倦也因有詩以戒之云云初登仕公四子公其仲也伯兄泰元早卒時登仕公年八十矣公奉養惟謹服勞奔走於公私之間不憚寒暑而未嘗自營其私惟恐其一日有所不懌也既而弟泰發亦早卒二子幼公教之長之無異已子凡有司之徭役鄉黨之慶弔不以及其弟姪故泰發之配黃氏能守其節至朝廷有旌表之盛亦由公撫長其孤而母能安於理義者

也季弟泰貞貧而無子業已析居公不忍復與同處飲食衣服者凡二十餘年嘗疾病公憂形於色求醫親進藥餌仍預為衣衾棺槨之具其天性篤於孝友每如此庚午之歲大歎隣有泣告者曰計窮無食待死而已公惻然以已業之契券質粟於巨室而分給焉由是有賴其全活者未熟而償巨室亦感其義而弗息也公內明而外直人有過輒面折之不假借仍為別白是非邪正不媚於富貴不欺於貧賤故人皆喜而無怨至於鄉黨

宗族隣曲苟有急難必盡力為之區畫扶持有紛爭必
為解釋平居最喜歌辛幼安詞手編而不釋遇有感興
輒賦一曲其辭氣率雄壯慷慨嘗自編集所撰詩詞若
千卷又嘗一遊秦淮浮彭蠡望匡廬莫不有詩詞以寫
其興初以生齒日夥為念別築一室于先廬之側晚年
復構於西偏而扁曰充輝上為重屋課諸子若孫讀書
其間而扁曰叢桂旁有小閣扁曰明明白馬仙巖諸山
羅列左右層青疊碧賓客過從必置酒食款語或竟日

分夜因自號為厚峯處士云公體力強實少疾至正戊子之秋忽卧病數日飲藥無效命諸子曰吾未嘗病今若此殆不起矣幸若輩婚嫁皆畢學初知方吾何憾但不及見其成立耳勉之須臾端坐而逝時七月十有八日也生至元甲申春秋六十有五配同邑何氏先四年卒子男六人儼鄉貢進士贛州路會昌州儒學正次儀傳倫偉侃倫為族人壽椿後偉先八年卒侃為弟泰貞後女一人適同邑周從吉孫男十有四人裕以明經中

甲申一榜再中丁亥一榜初授瑞州路儒學錄調袁州
路宜春縣儒學教諭次祉祥祐禮裏禴讓禘裳裾祚神
楚孫女十人曾孫男六人今以明年己丑十有一月壬
申葬于里之南山儼以書介其闕來請曰先君子雖與執
事未相識也而兄弟之托交則非一日矣知先君子者
非執事其誰敢請述其平生藉以乞銘于當世之立言
者余曰兄弟之文學表表於州閭鄉黨者固出於詩書
禮樂積累之餘亦由有善教之父兄故也傳曰愛子教

之以義方孟子亦曰人之樂有賢父兄至若其行已其有言其志意其事為吾固多聞矣苟辭而不述是為不揚善者也謹叙如右惟縉紳先生采擇焉

孫徵君哀辭

徵君諱徹字履常姓孫氏先世由金陵徙臨川河東張翥嘗錄邵文學與徵君甚相好也時翥父母讎居安仁翥歲時來省因得見徵君所與倡和詩多清練有法心每慕之天厯間哭舅氏過臨川始獲一再面焉由是數

交簡牘他日又得盡讀其平生所著古文率樂人為善
忠厚之氣藹然常掩卷歎曰如其人如其人初保章正
齊公道亨宣撫江西造其廬既廉訪使薩都拉公行部
至郡會元日公庭設宴召之共食位在太守上未幾東
陽柳公督提舉江西等處儒學知其貧亦命郡學廩以
上賓徵君為文謝焉又未幾全公平章江西行省請與
相見不往遂風郡縣采擇其文以遺逸薦于朝不報翰
林學士吳公澄奎章學士虞公集雖皆其鄉人然皆稱

道敬禮特異今藝文監丞清江揭公侯斯最其布衣交
闔郡之佳士友每相與論行事是非得失及詩書所發
明或所為文章并與他郡學者言則必曰孫先生孫先
生云其見景慕及足以表儀於人者蓋如此也年七十
四卒無子番易李存文而哀之其辭曰

惟汝水之清炯兮繞羊角而西流鍾秀潤於古今兮厥
有人其好修繫微君之踐行兮洵特出乎等夷由天常
之孔厚兮初不係于勉為華之於文辭兮又方駕夫作

者樂成乎人之美兮自優柔而安雅羌善惡之多雜兮
或有譽而有毀若徵君之全譽兮未嘗有毀言之入吾
耳豈補苴之能備兮抑彌縫之或周孰曰三代之遼闊
兮見此無瑕之天球人苟有寸長兮輒崖然以為高何
徵君之懋養兮恒孺子而自韜纍纍哉人之子兮已獨
胡而惇惇雖有女以館甥兮亦短棄而不并然應答之
甚戾兮似足危夫良心豈家運之自然兮匪人事之所
任顧青青之佩衿兮有升堂而知津殆聲氣之感孚兮

何必肉骨而始親蹇陋巷之褐冠兮披陳編以晨夕時
求人之非昔兮寧吾身之欣戚舉而或弗能以先兮蓋

寂寥乎王公之

闕

識其方嗟兮復不作乎九原

路漫漫莫能以臨穴兮旖翩翩恨

闕

發雖有辭以泄

哀兮尚臨風而慘怛

曾子輦行狀

泰定四年丁卯七月作

子輦姓曾氏曾本禹後夏少康之子曲烈封於鄆春秋
時為莒所并太子巫仕於魯因去邑為姓閱其家譜有

上官先生伯閏集賢侍制吳君養浩為之跋其先蓋居
建昌七世為少師南豐先生輩輩生綰綰生志皆朝散
郎志生迺迺嘗遊撫州臨川白玕鎮鎮有查氏喜而婿
之宋建炎間兵寇四起迺遂徙依查氏迺生富富生大
昇大昇生全全自白玕遷饒之安仁黃渡全生克俊二
子長貫道次振宋子輩其字也子輩幼而端慤好讀書
未冠時父析其業畀之以觀其才子輩應門總務有條
而不紊未幾父疾子輩祈於神請以身代疾少愈越二

年卒子輦哀毀如禮子輦善植生事母蒯氏甚歡家日以饒樂延師教子若姪里中之秀若舒君元易吳君光大皆嘗致之賓席時上饒有陳先生立大倡明陸子本心之學舒與吳皆嚴事之子輦亦慕而往一見大喜納弟子禮自此言行加謹與人處未嘗諧謔而亦和易不遷門有貿易之肆嘗攜僕取貨於市歸至中途僕告偶以誤多得貨即詬而還之或有來買貨而去者偶遺其貨於道子輦聞之復與之貨而不取其直又嘗有輸租


者租已入困其人已去子輦會其數有贏呼而還之嘗
學易楷書正經一卷囊佩之或休息於道或待舟於津
必出而誦夜則孤燈危坐揭卦畫於前而觀象玩辭焉
一日忽告同志者曰余於易頗有得應事接物一本於
此又曰孟子云萬物皆備於我余久疑乎是今已渙然
矣萬物即我我即萬物夫何疑其為里役也則戒子姪
奴僕毋叫囂以立威毋刻削以斂怨延祐間有司經理
田糧子輦適長於鄉勤勞晝夜介然自守嘗有持金以

餉者子輦曰國家重事寧私耶既而又有感其公正而以書幣來謝者子輦曰奉公而行何謝之為卻不受同役及胥吏輩皆歎服之母蒯氏卒子輦為不飲酒茹葷三年他日忽得痞疾但不食而泄初若無所甚苦候疾者皆應答如平時但拱手而寢越數日與其兄訣妻子進藥則曰吾疾不可起也何藥之有然所以飲之者不欲拂若輩意耳時舒君元易來問之子輦曰吾心澹然無異平昔時也明日日且是命取水來盥盥已須臾而

逝時延祐癸亥九月望日也子輦生於至元丙子閏三
月庚申享年四十有八娶張氏子二人長曰勗次曰昇
一日勗來再拜請曰先人之柩蓋塋於禮湖祖壠之右
將以己巳九月壬申藏於里之白茅闕惟執事知我先
人願有以述其平生將籍以乞銘于祝先生蕃遠者余
曰若思有以揚其前人之美是亦孝道之推也苟辭非
所以與人為善之義然古今天地之間有道德於身有
功烈于時人之所紀之者百世自不能忘也此不待論

亦有有名位足以顯人有貨賄足以惠於人有文字足以黼黻人身沒之後亦宜得人之述而若翁則無有是也使若翁生在往古時其所為亦衆人之所為而亦何表異之有然於斯世也又必待有名位有貨賄有文學者而後得以不朽於民俗果何勸焉且稽之古史一言一行之善在所必錄若翁賈而不貪故其於財也未嘗大裕役而不私若可以仕也而未嘗小試能達理於物我不為無見不動心於垂死近於有守此數者士大夫

亦或病焉而若翁能之而獨不能引其年而卒其業斯
豈不足惜也乎祝君義士也持吾言以往其必不以為
甚過者



侯菴集卷二十三

欽定四庫全書

集部

侯菴集卷二十四

詳校官監察御史

臣曹錫寶

中書

臣

劉源溥覆勘

總校官知縣

臣

楊懋珩

校對官中書

臣

嵇承志

膳錄監生

臣

熊夢祖

欽定四庫全書

侯菴集卷二十四

元李存撰

壙記誌銘墓表類

兄申伯墓誌

兄申伯字申伯性易直拂於人輒勃辯不少蓄然無留
恨雖遇未嘗相識者即執談狎處不為崖隅故人亦不
甚介介之初習律不卒業乃一意簡籍時作長短句
必流暢可觀至大四年春二月館于邑西之鮑氏夏四

月甲寅以疾卒享年三十有七興歸以殯冬十有一月
丙寅葬于大塘山中嗚呼大人幾七十矣弟存不足以
養安兄則胡忍而遂死耶前十日出七字詩九章少稱
美羣昆弟之才德兆若相訣然子興兒十五歲振振四
歲女阿快九歲教之長之而家室之弟存責也嗚呼謹
誌諸墓

湯君直墓誌銘

君直諱雷奮湯姓鄱陽崇義里人也曾大父于宋通直

郎知湖州武康縣主管江西安撫司機宜文字大父潛
早卒父志仁宣教郎浙江安撫司幹官邵陽主簿國初
一嘗起家為縣文學時君直纔二十餘書博覽強記文
學府君卒家益落而君直學則不弛吟詩作文百十詩
可立就雖若不經意然粹以密又涉獵法家者書若曰
某事當若何而決則舉某律某律云云又善蒙古書文
又善推步星辰知人命賤貴短長至元間宣尉李公思
衍愛而客之宣尉卒子商佐遇之彌厚久之商佐任為

新昌主簿以君直往後五年陟長興州判官復以君直
往時浙東西大疫死者十四五君直死焉商佐哭而衣
棺之而歸骨其鄉以葬妻張氏子男二人皆幼鄉里莫
不憐之李存曰李與湯氏世姻也前年始一經其里愛
其山水潔清良田灌木有以想見曩時詩書冠裳何其
盛也自文學君以上咸學行有聞今其子孫往往散落
不業君直敏而愿且藝真良家子也衣食奔走未嘗一
日給依於人又無成且客死不幸妻若子無所於嗚呼

事物之於消長也其亦有不知疑當知焉如是耶

上饒陳先生墓誌銘

甚哉學之不明也宋淳熙間陸文安公出大發古聖賢之旨時承流繼覺甚盛而近世溺於訓詁詞章科目雜藝尤甚無肯道其學者上饒陳先生幼業儒不隨世碌碌嘗遇異人授金丹術既得陸氏書讀之喜曰此豈不足以致吾知耶又豈不足以勉吾之行耶而他求也於是盡求其書及其門人如楊敬仲傅子淵袁廣徽錢子是

陳仲和周可象所著易書詩春秋禮孝經論語等書讀之益喜益知益行或病其違世所尚先生曰理則然爾甚者譏非之毀短之朋排之又甚者求欲危中之先生曰死不悔從之遊者徃徃有省由是人始知陸氏學至順庚午十有二月既望以疾卒得年七十有五先生諱某字立大曾祖友諒祖元慶父一震配鄭氏子男一曰善女三婿周良弼段新項謙孫男三曰穎東辰辰為從子開先後明年三月丁酉殯邑東郭又明年九月己酉葬瑜

山先生剛方正大於人情物理靡不通練強禦無所畏
姦慝無所逃浮沉里巷之間而毅然以倡明古道為己
任患難困苦終其身而拳拳於學術異同之辨無十金
之產一命之貴而有憂天下後世之心嗚呼若先生者
非所謂弘毅之君子也歟其論著其他言行其所以啟
迪學者之方門人祝蕃述之備已存雖不敏亦受業於
先生之門謹撫其大者誌諸墓李某為之銘曰

學久荒今則萌困弗享後有成由先生

毛季成墓誌銘

君諱克周字季成上世由鉅鹿徙三衢唐貞元間有諱
延康者為饒別駕因家為饒人宋慶厯間延康五世孫
儀又擇屬縣安仁山田里以居儀五世孫伯昭伯昭生
天錫天錫生鵬飛是為季成曾大父大父也鵬飛娶臨
川陸氏文安公闕世孫女也季成幼而穎俊長貫穿經
史百家言為詩文援筆立成若甚不經意然往往暢麗
可觀鄉里有相非是欲訟言者輒為剖析利害解分有

非意糾結為指畫應接無難者國初故家多零替季成獨克保弗隳客至必具酒食平居嘗誦孟子我善養吾浩然之氣之言而自題其齋之楣曰養浩人因稱養浩處士元統二年九月戊子以疾卒享年五十有八配陸氏男二人相儒屋生女二人壻王益善上官崎將以十有二月壬申葬竹塢相儒嘗受業於存故來請銘銘曰儒也而不病於拘才也雖未試而洵有餘胡不百歲而歸其居

黃晉昭墓誌銘

先生諱復之字晉昭姓黃氏其先由盱南豐徙撫金谿
曾祖輝祖楠父汝益先生幼勵志舉子業夜或不寢邑
潘氏才而婚之國初科舉廢從故宋南城開國伯周公
方淳安令曾公子良講明禮義學見稱二公遠近俊秀
多從之遊先生兄弟四人養二親至終喪咸身任之伯
兄早世季弟為人後仲弟亦贅他氏歲時必會先生家
觴詠辯說累浹旬乃已婦翁死子幼教之長之為築室

鄰之死棺槨葬祭之先皇帝即位之明年詔天下高士
耆德者有司旌其閭先生時年八十有一邑相與謀曰
年易有也德之稱為難耳合是二者其唯先生乎於是
白大夫大夫戒里胥即其居樹門特書如令元統二年
九月辛亥以疾卒享年八十有四娶潘氏先幾年卒續
潘氏其弟也子四人繩武先幾年卒維清純道續慶皆
謹飭能文詞女一嫀某維清以十有二月庚申葬同里
小街先墓之次以存嘗辱交先生前事持曾君伯堅狀

來請銘往年先生館于敝邑上官氏存方弱冠亦為其宗家句讀者師先生高冠寬衣采頤潤豐二毛蕭疎觀其氣藹如也聽其言粹如也其後二十五年偶過上饒昂山王氏而先生適教授其家一見握手論別後事因與倘佯水石松竹間甚歡又十年而銘其墓不亦悲乎先生之詩正而不俚嚴而不苦先生之文贍給而不冗紆徐而不弱句有奇思有巧先生既不為世用家又無餘財無恩怨於鄉里其私淑諸人者率底於有成殆亦

古所謂寡過君子也乎舊家金谿板橋後徙曹家洲人
因尊稱為曹洲先生云銘曰

裕爾中嗇爾逢康而翁天之公崇斯封保無窮

女子寄楊墓碑

李存有女子曰寄楊生於至大三年某月日母以躋不
能育寄育於楊氏之婦而名明年四月甲子疾肝風頭
搖謁醫謂不可為也雖藥之病益急憐其育於外且死
於外明日以歸猶視息夜半而絕埋於此嗟乎嬰而死

亦何為而生耶誌墓碑

彭萬里墓誌銘

彭萬里其先蓋番禺人五世祖廸功郎可遷撫之金谿可生中孚宋嘉祐進士中孚生思齊承務郎桂陽府參軍思齊生經經生攀龍攀龍生天翼萬里其字也幼而機警甫三歲已能識別歷代錢文數十浸長從師讀書常夜分不寐國初士族或拘軟不事事因稍習通新故典章久之補樂安縣吏遇疑罪能毅然白輕遣之未幾

以母憂去他日謂諸子輩曰世之從事乎刀筆而能不
自欺者鮮矣苟自欺如祖宗若輩何吾則安吾素而已
矣於是暇則種花理竹或援筆賦小詩或對酒歌古詞
以自樂至順辛未十有二月寢疾所居前榮舊有梅一
株丙寅問曰梅已華未曰已華命扶掖出視之因口占
律詩二句翌早奄然而逝生於咸淳己巳得年六十有
三配謝氏先幾年卒子四人女二長適同邑周顏樂次
未行以明年五月戊寅祔于邑之演頭原祖墓次前事

舉來請銘且曰舉嘗遠從諸公先生游先人未嘗不手
為之裝出門未嘗不目送之歸則又未嘗不叩其所得
而為之喜也余曰所謂人之樂有賢父兄者其此之謂
歟是為銘

吳英子墓誌

君諱孝祥字英子世為番禺安仁人曾大父彥才大父
拼父道明君靜淵人也對客或移時始一語閉室坐竟
日不聞咳唾聲若空無人者人或稱譽忤訾已未嘗色

於喜怒其讀書為文辭必抽心括胃致之纖深里中後
進學者胡武嘗從之遊至大元年二月辛亥以疾卒享
年六十八月壬寅葬長塘山去家二里而近胡武為余
言君嘗夜夢一老人曰而面有黃子滿十則而命不延
已旦而鏡之一以告其家人死年適如其數其無乃鬼
兆也與君負郭有宅一區田百餘畝桑柘百株薑韭百
數十塍雖老死斯時可無憾也配周氏子三人景周景
漢景明云

姜光叔墓銘

天歷某年冬十月某日番禺之安仁恒豐里姜君應明
光叔卒享年八十有三子三人長遇文次遇炳遇成先
卒遇文以明年十有二月丙寅葬于里之水北既葬來
請銘謂將以刻諸墓上某曰古今銘有法不可以苟而
遇文請不置念無以慰其哀慕謹按其世系而為之銘
曰

姜氏之先得姓于蕭既國東海繩繩公侯五代淮南三

司使冲生子處嗣疆場有功出刺處州入為大監李氏
奪國棄官東泛初宅金陵既來番易支分派別麻厯黃
塘畝曰大熟里名恒豐益蔓其居譜牒斯通惟此光叔
樸而不華雖則更代克保厥家有諱彥興是乃曾祖伯
政弘恢乃祖乃父光叔有子宜壽而寧林嬉臯娛不知
搶攘淳祐丁未是生光叔至順庚午幽深斯斲其斲伊
何在水之北綿綿孝思來視茲刻

河南楊府君墓誌

至大二年河南楊君珪來尹安仁嘉問學而厚和秋以
其子世德受業於存明年謂存曰珪家世為河南楊武
人中罹兵革家以散沒先府君時七十餘隻身流避杞
婿袁氏既而遷睢陽力田業澹不及聲祿隆信義見老
者與困窶者識不識咸敬憐之人有遇害患或躡身持
援一不慮險艱夫人少言語喜怒不外見母曹嘗疾病
潛香請於神明割臂肉隱之羹以進病乃甦里中稱其
勇愛至元十三年府君卒壽五十四葬萬戶林夫人後

二十五年卒壽若干葬居西今珪之官於江南也吾魂
夢未嘗不在墳墓也念骨肉之阻於土比聞河水溢必
沮如將以某月日更而合諸輿塏者子其為我銘也亦
以世德之及門也存曰嗟乎孰謂死者一日而歸朽也
有不係於後人之心為若是安之而揚之者耶公諱義
字某曾大父某太父某父某金鄭州太守夫人諱法心
曾大父某大父某父某子四人長縣尹珪也次某早卒
次某河南軍百夫長次某江西生米寨巡檢女一人適

潘某云

道錄張君墓誌銘

君諱元漢字義可番禺安仁人也幼慕老子法入冲虛山中師事胡公可善國初制道家以上饒張氏之傳為正一宜主領其教事凡郡縣之宮若觀得以其徒之通敏於時者而官司之由是義可判袁州錄太平州咸用優稱他日歸謂其人曰吾固慕夫玄默者也而何廼馳馳然於從事為遂悉其錢財葺祠宇增像具暇則理花

木果蔬以自娛客至整巾裾出揖讓進退可觀坐談事
有始末可聽然好面折人失過至切切不少假借人或
不能堪若比于中深而外和含糊坐視短長者其於交
際益損為何如也至大四年秋八月庚午卒享年六十
有一冬十有二月庚申葬於山左之馬家原其徒丘守
中朱雲舉陳大榮張申如江以蒙吳處誠而陳大榮來請
銘當義可之淹于疾也大榮必手藥食之其死也則盡
哀其猶有所欲為也受成命而經紀焉亦可謂隆於情

義者矣宜為之銘銘曰

官不居畏於愚益於虛沒而餘得其徒

吳君才甫墓銘

君諱天成字才甫世為南海廣州人曾大父純臣宋通奉大夫提點廣西刑獄大父雍朝奉大夫沿邊安撫使父起莘將仕郎史館檢閱君幼而倜儻善走馬擊毬以安撫公任亦官將仕郎初蜀郡王公榘客居番禺之安仁德祐間通判潮州道廣州與檢閱公相歡也居頃之

檢閱公公夫人相繼卒潮州以其女女君入國朝潮州
復來安仁以偕居至元間君一歸廣州明年以其從弟森
來森孤君子而長之未幾夫人王氏卒君遂經紀其貨財
卜宅于邑西之古城里而繼室安仁王氏君益自靜密
後夫人以通敏佐之大乃室宇廣乃田疇睦乃姻婭室
家乃男女君嘗曰吾南海人也而於此焉家豈非分耶
今且老矣願及其未斃也得一再返鄉里省墳墓問親
戚故舊則死且不朽既而疾逾期而卒時至大四年十

月庚辰也享年五十有七子四人長以森也次曰菜曰
蘭先夫人出也次晉寶側出也女二人亦先夫人出也
長適餘干黃鑰次同邑上官植諸孤以其年之十有二
月壬申葬君於楊湖山中森來請銘而君嘗以茱蘭從
余遊義不得辭銘曰

世之言客而不思其鄉者有二以貴富以賤貧貴富者
無所不樂或以不思賤貧者雖思而慚如不思焉今君
之家此土也門戶井井爾也不墜於其先雖不幸而不

遂其志亦可謂近厚不薄者哉

詹氏孺人墓誌銘

孺人諱壽姓詹氏世居信州貴溪縣龍回山中父壬宋
季有能詩聲笄而歸同縣蘧君自得畊道君儒家而貧
性好客客至但與坐語酒食不命而出或無所於具孺
人質簪珥以市君多不知也君由是聲聞日廣禮部用
薦者檄錄邵武路儒學久之君卒孺人亦高年躬督喪
葬如儀子養晦幼從術家言不可以娶妻生子入龍虎

山中為道士而子金氏之子曰養正生宋淳祐甲辰卒
今延祐乙卯七月甲午春秋七十有二葬聞人坊養晦
後十一年卒嘗從其師入朝得賜號明遠靈悟通妙法
師養正以溪水齧射墓地慮不妥元統甲戌十月己未
葬龍壇阡孫三人震霖霖復入龍虎山嗣養晦法云銘
曰

酒食自出夫子歡葬不得所兒敢安龍壇之阡固且完

黃旭墓誌

黃旭字彥賓上世由嶺南來居信州弋陽縣黃原有諱
鴻舉者宋紹興間衡州文學孫某多積粟歲大侵能食
鄉里餓者時四明袁正肅公甫提點刑獄江東義之辟
為某郡酒庫贍軍贍軍生判院舍人某生中中生思永
思永生有慶字履善能自植立入國朝家益大旭其長
子也生至大辛亥卒元統甲戌十有二月壬申得年二
十有四娶周氏履善哭之慟而告之曰汝天無子汝弟
苟有子吾先以後汝明年三月丙子葬白石原旭師同

郡遽震葛彞他日二子來見其弟復且同辭而言曰旭
生而重厚不好弄不苟言一聞為學大義即輿然知自
愛曰人苟志道義者窮達死生有不足為之累矣吾齒
且長將求諸四方達者而學焉既而疾革歎曰吾其已
夫其不得以遂吾志報吾親乎旭言如是吾子旭所慕
者賜一言以誌其墓慰其意若何李某曰甚哉二子者
樂道人之善旭有美質有鄉方而大宜其親之悲也親
而悲之庸或係於其私而鄉黨朋友悲之信乎其可才

也

余君文瑞墓誌銘

至正二年秋七月臨川余尚來再拜曰尚不孝先君子
以至元後己卯十月丙午棄世顧貧且拘不能時厥事
益不孝將以今九月壬申葬里之前山惟先君子幼有
矩矱不隨羣兒戲學既成則假館教授以業大父性素
嚴大母復多疾年皆七十無十畝之產先君子性和易
窮居若裕得其懽心與人絕不為崖岸宗里姻交無或

非之敢請吾子文其幽藉以少逭夫不孝者尚也少恐不信則有宗人文明之述在存曰嗟乎若爾先君子者可謂儒而不失其所自守者矣宜次而銘之君諱瑞字文瑞姓余氏曾大父諱信大父諱鑄父諱浩字叔浩母湯氏君生至元戊寅年六十有二娶曾氏子二長申陽實從姪幼失父母君子之次尚女二人長適番禺陳復次適同里吳紱孫男朝生孫女三長適吳其餘幼夫余之得姓受氏遠矣按其家譜五季有諱某者由昭武避

亂徙撫金谿之火原里其後日蕃且大環數里罕他姓
故太學上舍鑰以文行師表州里進士景翔負能詩聲
皆君從大父也皆從之遊課試每占前列上舍公喜曰
吾家其世有儒乎叔浩亦屬文舊有聲場屋嘗樂誦孟
子養吾浩然之氣之言學者從而尊稱之以為養吾先
生既而君克肖復稱為亦吾云銘曰

人有瑣瑣蘄且馳我則裕矣安弗為弓冶之子猶裘箕
雖不張王何忸怩前山之藏其妥而

樟南吳山人墓銘

撫州南金谿之吳為詩書家余嘗及交數君子率謙讓
厚和聞有德明父者以種學積文教授于鄉里乃未及
識朋友之東西行未嘗不交相為問又聞其族居數百
載有古樟其大十圍枝葉覆陰百畝德明構重屋其南
戶牖面之置古書畫器四集子弟絃誦燕賓客其上因
自號為樟南山人他日忽有大布之衣纍然而踵吾門
者問之蓋德明仲子綸也德明以至正己丑二月戊寅

卒將以九月癸酉葬冠嶠且死謂之曰吾嘗欲自述平生今不能已銘吾墓者必江東李君乎故敢以請余愧不弔遂不辭德明諱慶熙性和而剛人有善必嘉獎之有不善必委曲開導之好自用者能面折之况兄鰥而貧姊疾不嫁能養之卒葬之生至元辛巳春秋六十有九有著述三十餘卷先正評之曰文則端削刻厲無山林枯槁之氣詩則聲辨而閎節幽而適長短句則辭麗而音婉咸以為然娶余氏子三人縈綸紱女三人長壻

余文學次曾性皆同邑人曾大父諱湛大父諱泰亨父諱庭蘭字伯秀宋咸淳間由乙科待補太學生有詩名吳文正公序其集學者尊稱為靜遠先生其宗有居新田者沙岡者郭仙者吳塘者吉原者歲正月元日會長幼無慮萬餘指必富者主之謂可以容車馬具饗殮德明獨請曰此家之盛事雖貧敢不自強因其言有勸者其上世由濮陽而金陵而信之弋陽三山而撫之金谿沙岡五世祖青陽尉沆徙今吉原云李存曰余與德明

生之年同業同出處同男女多寡同而死之先後獨不同何也世稱莊周善齊物果其言之寓耶抑亦有其理也苟有其理則何生之足喜而何死之足悲耶且人之於世識不難而知難余與德明縱無一日晤語之歡今聞為是言也寧不一灑然於泉下也乎是為銘

于桂軒墓銘

序缺
田族攏傍
葬山

是山為塋是田為成以安厥靈宰樹蒼蒼父母不忘兄弟斯藏團山渾淪爾丘爾園宜爾子孫雲仍于思刻石

于辭桂軒之宜

于君孟高墓誌銘

君諱岳字孟高姓于氏其先由長沙徙饒之安仁青山
既入徙樓山曾祖諱某祖諱某父諱希顏君幼而端重
長而寬慈克敬於鄉里歲旱必齋戒而禱有疾癘必為
攘且藥有辨爭必解勸之逋負度不能償者置之喪葬
度不能給者助之人有田宅相與者必直而受之而非
所致意焉嘗有來曰某有某土君之疆也宜以歸君而

某氏欲之若何君笑曰吾不奪人欲也子其與之君之
基與某氏地接他日其妻死謀葬拘忌以禍咸謂可拒
止也君曰禍福在天人何能為闢垣墻道之入縞冠執
紼而禮之歲庚午大飢機有綿售一束愿得錢三百即
與之既而計其直倍也明日訪其人復與三百族有故
基屬君已三十年忽念曰某家唯壹人耳而無所底止
召而還之使復築也先世之藏有曰大姑四者且百年
術家謂其興盛此墓之由他日有焚其親之骨竊塋附

檨者事泄君蹤而得人意其必棄散也而君則擇地埋之曰庶其復收彼骨何罪至正丙戌四月庚申以疾卒生至元己卯享年六十有八娶餘千余氏子男三人長中金玉局摠管照磨次勉女一人適同邑上官昶孫男三人以其年十月某日葬株樹林中來請銘李某曰家之興蓋必有德者生焉今觀孟高之為不薄何慙慙也鄉里稱之子孫則之可謂長厚人矣是為銘

薛方彥墓誌銘

方彥姓薛氏世為貴溪縣漸步里人其先多顯官碩儒
曾大父某大父某父某國初科舉廢世族子弟孤潔秀
拔率從釋老游故方彥亦入龍虎山中奉真院習清靜
言云方彥甚警敏道藏書儒家經史靡所不覽余君士
益甚器愛之而資之學稍長加冠服能賦詩語意輒不
苟其季父玄卿同山而異寮有詩名於時實亟稱之而
學士虞公亦為之序又能鼓琴刻其琴之陰曰條風嘗
請予賦條風之辭他日士益自營其藏於前山之陽俾

方彥董之方彥為手植杉檜數萬本而次第屋室之士
益曰守斯營者其方彥乎無何方彥以疾卒時至正乙
酉三月日也生於己酉得年三十有七平居頗廉約與
人處未嘗自能由方彥而上某某皆某所嚴由方彥
而下曰某將以某月某塋前山所營之左上官甚來請
銘銘曰

蒼蒼而玄玄既豐爾才亦胡為乎嗇爾年山之前忽此
阡惟長歌短篇庶其有可傳

秋碧先生孫公墓碑

至正乙酉夏六月某日龍虎山葉某來曰某之師孫公也受業於公之門者多矣某雖最後然自髫髻至成人皆公德也當公之沒而葬誌在其壙者槩而不詳每病之敢述其平生以請將刻諸墓上某曰死事而緩春秋所譏曰緩固罪也有美而不傳亦罪也顧無以辭按所述而文焉公諱某先自汴徙金陵既徙上饒曾大父某大父某父某公兒時有成人風父曰此兒豈塵埃中物

命入龍虎山中師事薛公某為黃老言既長美髯長身曠如也三十八代天師張公才而置之幕下嘗乘傳奉表京師大德間判廣西靜江道司未幾陞道錄曰吾舍親從師果何為者而碌碌低昂若是弗就職至治間里火私室為之燼公即白其長而新之不期月而完既迺謝諸事惟日稽經史歷代帝王紀年為纂要數十卷又孜孜求善言行若日不足者每曰人生欲仰俯無愧耳豈徒以遯林谷為名高哉他日忽臥疾左右進藥曰

吾疾病以何藥為奄然而逝時至順壬申四月某日也
生宋咸淳戊辰得年六十有五弟子凡三十有八人以
其年五月壬申祔城門先塋公事親孝事師恭待下以
和與人交有信功於人未嘗自言且德色也人皆高稱
秋碧先生云復系之詩曰

世有勲爵身亡而亡曷其亡然後繭弗張繫此孫公林
下之綱幼寔穎雅長而軒昂德則陵阿蓼蓼菁菁才可
厯試豈惟肯堂宜俾其人深懷孔傷嗟爾師友已外于

方相視倏然率理弗荒乃托斯文森森天常樂育之風
有繼其芳山高水清衿佩鏘鏘視此貞刻永矢勿忘

程君明仲配萬氏墓碣

餘干清溪觀道士程希浩來曰希浩幼出家既不得朝
夕養父母父母沒復不得歲時躬薦享求所以不朽之
者道無由敢述其平生乞一言以刻諸石而詔夫後之
人余嘉之輒叙而文之君諱鑑字仲明其先由金陵遷
番易曾大父諱濟大父諱文子父諱一新君九歲父母

相繼即世保抱皆老奴嫗晝則皁胥詐之暮則盜賊闖之家蕩然稍長知自立娶同邑萬氏輔以儉約勤絲枲而君亦稍以公直見稱鄉里言行事大率公不私遇孱弱待僕妾無不情盡會有召役躬出入郡邑或牽糾不歸者連歲初居餘干習泰鄉紅岸橋東西即豫章境上宋建炎間制置謝公枋得軍安仁時豫章已內附候者謂大兵自江右來必經是橋由是公遣將焚之延及居人程氏所藏書史器皿契券無遺者君構室橋西以居

自占籍豫章上世有受朝奉郎者無譜牒可考獨餘分財產闕約一通題曰程朝奉家云既而子孫衆室隘則新而廣之傍山多蘭每移培軒墀下人因號君為愛蘭翁也孺人以仍改至元丙子十有一月日卒生前至元乙亥享年六十有二明年十有一月丁酉葬馬道原曾大父某大父某父某母那氏宋四川茶馬使孟卿之孫後七年為至正壬午九月君卒時年過七十聰明強健如壯父者生宋咸淳庚午享年七十有三以某月某日

合葬于馬道原之兆子男五人長希祖次希浩次希本
次希顏次少牧亦從希浩着道士服清溪觀云李某曰
人言老氏之流為申韓刑名蓋以其刻峭少恩也希浩
為老者而獨能篤於親唯恐其善之不聞况程君早孤
多難自立家以復振其亦有可書者歟

父母趙氏夫人墓誌銘

夫人諱若裕姓趙氏上世宋秦王廷美其後有居饒之
餘干者曾大父太中大夫諱彥仙大父福建帥府機宜

諱惇夫父廣昌縣主簿諱時潔夫人笄而歸臨川艾公
天定宗道初娶危氏生男女二人而卒繼以夫人時男
女皆幼夫人視由已出生四男三女而宗道卒至正乙
酉十月二十日卒生宋德祐丙辰春秋九十子男五人長
暉次某某婚某某將以卒之月壬申葬石坑暉走百里
犯水潦懇懇焉道母德於予且乞銘焉銘曰

燈燈貴胄來嬪士家孝及舅姑力于桑麻夫子前逝禮
循凶嘉聲闕堂閭步絕泥沙譬彼良玉溫其無瑕晚崇

佛典不奢不窪宜壽之上宜福之遐胡為一疾

闕

石坑之山松栢茂佳利彼嗣人綿綿瓜瓞銘詩我作
孰媚而誇

侯菴集卷二十四

欽定四庫全書

侯菴集卷二十五

元 李存 撰

壙記誌銘墓表

王景達墓誌

王埏字景達其先蜀潼川涪城人從曾大父諱庚應宋
嘉熙中由右侍郎官出都大提點坑冶司饒州方時蜀
在邊人危於被兵因留家饒安仁云曾大父諱辰應朝
奉大夫知施州大父諱榮朝散郎通判武岡軍事國朝

進武畧將軍同知武岡路總管府事父庶子恭埏幼而
端愿寡言笑怒喜不外見稍長善讀書鏘然如出金石
既冠昏益治家事元統間任受道州路永明稅務大使
至元五年三月乙丑以疾卒凡昏交鄉里至于僕妾無
不咨嗟涕淚之生大德辛丑得年三十有九娶吳氏子
男三人長某國學陪堂次鎮郎次德槐女三長許適同
里吳某俞某次幼以是月乙酉祔武岡府君墓下里曰
高嶺埏嘗受學於存其疾也存累累視之卒之夜存勉

之勿芥蒂坦然聽納勅妻子各事事母我戚遂逝今
葬也其孤願有以志其掩諸幽者以慰之存曰埏之為
人也謂宜壽耶曾不以半百為夭耶亦既四十而有子
矣命於天者其庸可違乎壽其何必喜而夭其何必悲
乎彼高者嶺千古之一歸乎

馮紹先墓誌銘

紹先姓馮諱瑞景世為信之貴溪縣馮原里人曾大父
某大父某父某幼從師某學道龍虎山中及壯侍玄教

大宗師吳公成季于朝未幾被璽書提舉饒州安仁縣
崇文宮事紹先短身長髯遇事果敏人不能欺嘗扁其
所游息之室曰獨牧菴集賢直學士豫章揭公侯斯為
之記至元六年夏天師大宗師皆檄君整理東南諸宮
觀事十月辛酉以疾卒生至元庚寅得年五十有一其
弟子祝永慶先十年卒次則蔡允中等以十有二月丙
申葬荷花石下君平時所自擇也允中以君少從存游
請銘其墓存曰君雖黃冠居林下其才器有足用于時

非瑣瑣不振者也惜志若未盡遂復不得高年以沒豈
非命哉然既為老氏學未必有所芥蒂矣是為銘

上官氏古脩墓誌銘

公諱璵字伯潤姓上官氏或曰其先蓋出於芊公子蘭
蘭為上官邑大夫因氏焉後居閩五代末有守正者徙
饒之安仁七世孫炤迪功郎知藤州岑溪縣生元善元
善生宗德是為公之父公幼而端敏嘗讀書上饒徐巖
國初科舉廢

闕

頗亦時出奇又喜為長短句及

常所往來簡牘必新俊膾炙人口有詩文若干卷行于世所居室琴瑟書畫几案間景置整整客至與清坐煮茶日竟夜分無倦容人亦不忍遽舍去親昆弟四人子姪數十輩無間言鄉里或寒者減衣衣之飢者分已食食之雖農圃臧獲語及公靡有不惻惻然者居之南百里外為古象山昔陸文安公講學其上天氣清朗時渰渰如翠色公素慕文安之學構小閣松竹間面之而題其楣曰翠南山人傍郡佳子弟多從之游每曰古之人

惟修其天爵而已耳故咸復尊稱之曰古修先生公神清而形癯美鬚髯衰年益童顏常着紗帽披氅衣人望之翛然即之溫然聽其論灑灑然嗟乎其亦古君子之徒歟至順元年十月十九日卒生宋寶祐癸丑享年七十有八娶馮氏先卒子男四人伸佐億僕女一人適同邑李卓孫男七人孫女忍曾孫二人公於是年春嘗自為文預誌其墓及病中作中秋等詞類曠遠於生死無滯礙者又嘗特書于東曰我死毋事浮屠伸等將以十

有二月庚申葬于里之桂洲舒家原以書來請銘且曰
吾父疾病時命諸子曰銘吾封者必李君也存曰當世
縉紳先生知公者蓋不少且公平生所著述傳而誦者
多矣何憂乎不聞而公又以子妻吾兒人其以我為私
乎仲等曰然則如治命何不獲已而銘曰
崇茲墳不理而文

周氏孺人墓誌銘

至正甲申正月某日信州貴溪縣孫君允元德昇以書

抵余曰僕之妻周邑之上巒里人笄而歸于僕性端重
不尚粧飾勤絲枲賴以不匱先妣董待下嚴克奉順意
有所俾輒用其私財不吝嘗自言其祖制榦府君素不
易許與從祖監元府君親昆弟三人其出繼於王氏者
為漕元公入國朝家皆甚大尚詩書而好賓客四方莫
不聞祖姑則又配三十六代天師張公得封慈濟元君
貴重一時咸喜其謹恪愛遇有加焉至正壬午十有二
月某日以疾卒生至元甲申享年五十有九僕家有園

數畝桑柘外頗植花果暇日未嘗不同游觀平居有所
欲為未嘗相逆也卒之年僕適六十三月方將近郡歸
欣然出迎既而親友四集以慶躬治具纖悉無遺者嗟
乎雖偕老而至於七十八九十於俗情何多豈造物
者似俾其訣於余也今將以某月日葬里之修家原吾
子之文辭有近於古者敢述以請而刻諸墓按周氏諱
淑敬曾祖諱新故宋將仕郎某處提刑司幹辦官祖諱
以柔迪功郎某處節制司幹辦官父良輔子一人孟輝

女二人長適周恭 次適番易余璉因嘆曰墓皆有銘
非古也然內行孰有不信於其夫子之言易稱婦人貞
吉者周之謂也是為銘

夏升之墓誌銘

升之姓夏氏諱有慶世居饒州安仁縣洲頭里曾大父
諱某大父諱孟鎔宋 闕 間鄉貢進士父諱祖禹徙信

州貴溪縣沂陽升之幼敏厚讀書父嘗疾病刲股肉糜
而食之愈母死既終喪每戚戚不樂且賦詩自悲他日

一遊東吳西蜀北及于京師最善奕旁數郡奕者多為之弱後至元庚辰某月卒生某年甲午享年四十有七娶安仁鄔氏先十九年卒子曰衍再娶臨川饒氏子曰觀皆先卒衍美質知向學嘗從余游以壬午正月某日葬郭原來乞銘銘曰

少而修壯而遊雖年之邁顧有人兮為箕為裘宜休休乎此丘

張子威墓誌銘

子威諱靄姓張氏世為信之貴溪上礫里人曾大父某
嘗學易於琴山傅先生某宋某年間由推恩受運管承
務當時從之游者尊稱之為靜寮先生云大父某博學
尤長於詩登咸淳十二年進士第累官知饒州德興縣
父某國朝池州路儒學教授子威生再月而教授卒稍長
母馮氏力教之他日聞先世遺事痛自傷欲遠來師友
為學以自振然不忍去母於是珍藏其書史圖書曰以
俟吾子孫乎力耕稼以為養稍喜讀黃帝岐伯伊尹湯

液張長沙諸論察脉伐病鄉里稱焉既有薦於醫司者
檄錄醫學不赴至正某年某月日偶疾自脉曰吾其死
乎果尋卒生至元甲子得年四十有九配周氏嘗有子
不育子兄祿之子益明先一年卒有孫一人曰某才

闕

歲妾周氏有子名某後七日卒女二長贅同邑周冕次
幼以明年三月甲申葬里之萬山從運管公之兆余嘗
識子威長身而皙澤與人和而不忤婿周冕能擇師教
之冕未有成未克報而子威死冕悲之為乞銘嗟乎子

威子兄之子既豫以死妻幸而子又隨以死造物之於
子威何爾酷耶然則婿能御其德而不朽之其亦足以
少慰子威於泉下也乎是為銘

祝蕃遠墓誌銘

公諱蕃字蕃遠姓祝氏上世有諱毫者自衢來今信之
玉山縣因家焉其後又徙貴溪縣西昂里曾大父諱宗
周大父諱汝煥父諱起嚴宋某年間鄉貢進士公幼而
警敏縣人有陳先生某者獨得陸文安公本心之學蕃

遠從之游稍長頗不羈他日感悔復求從先生痛自刻厲久而有省大信大喜曰論語曰吾無隱乎爾記曰風霆流形庶物露生無非教也自是斯須不廢內觀因購求當時陸氏師友遺書特抄廣傳期以大明此朋友知慕鄉者輒明目張膽為言親之猶同根援之與其進得一善躍然如出諸己氣質之偏慝攻辨之不遺餘力故一時登先生之門者皆推先焉其事師之禮尤謹苟宜費而乏雖質粥田宅無所靳也久之郡縣以茂才異等

薦之行省授某州高節書院山長歲適大比以易經中鄉舉會試不利文安公舊講學象山祠宇久廢言郡縣率同志復構祠其上秋仲丁遠近與舍菜者嘗不下百人文安之後僅有文美者甚貧五十而鰥求而資之娶未幾改授饒州南溪書院山長學者輻湊調集慶路儒學正南臺都事奏公某聽其講經明暢即命子受學滿陞饒州路儒學教授遺書幣致旁郡知名之士訓導各齋又未幾前信守敏珠爾平章湖廣行省辟為掾史叅

政蘇公天爵一見甚器重之海北憲使巴咱爾以賊敗
法徙努爾以厚賄求近不可播州宣慰楊公某率酋長
請驛以朝或難其非述職之常且故事上下皆有贄公
却不受曰非所以懷遠人也遂白平章給驛馬既而授將
仕郎潯州路總管府經歷先是屬司報徭賊數百入境
同知布通勒兵迎敵及境賊已去他界平民一人被掠
脫身走卒遇官軍竄草中布通執而賊之曰我本他郡
農與兄弟來耕某氏田居近郊非盜也擄掠死獄中布

通因偽辭連繫其兄弟親戚七人以絕言者公至疑不
署牘聞帥府移南容州推問布通賄不就辨四人又死
獄中適朝廷遣使巡行天下尚書巴克實歷廣東西聞
其冤命更擇廉明由是靜江路同知巴延布哈慶遠府
安撫司知事李剛會梧州推問事白曹吏二人伏罪未
死三人者拘于外布通復不就辨且教曹吏家人訴帥
府復移藤州會赦皆免公竟死藤州客舍時至正丁亥
十月也生至元丙戌春秋六十有二夫人徐氏先二年

卒子二人長文中次文剛文中扶櫬踰五嶺以歸至豫章亦病死舟中文剛以明年十有一月甲辰葬饒橋公嘗與故司業鄧公文原辨格物凡數千言及平生所為雜詩文若干卷其才思如河流其論事率激切無所回忌四方多傳誦前事文剛來乞銘顧雖與公為同門駕下不逮遠甚而切偲之義甚深也敢辭因起敬言曰公質直而氣剛信道而明義或謂潯之辨滕之死殆不善為身謀應之曰非而遂之蕃遠不為也居其位坐視無

辜死蕃遠肯為之乎前乎吾事撥而不與則偷勢有不
可故以去之益偷然則蔓且緩若何曰其心必謂是非
之公不可一日不明於天下無乃用於其細曰蠻夷之
俗戇而忿睚眦輒殺傷二十年間嘯聚而逆命者往往
而有多由吏於其土貪者魚肉之忍者草芥之刑罰不
中使其無所措手足今蕃遠之為小人則笑君子則愧
正一事或可安邊鄙數千里然用不盡其才死不在牖
下羈窮瘴毒其志亦可悲也夫是為銘

舅氏隆卧先生吳公墓誌銘

公諱某字長翁世為撫州臨川縣遵化鄉蔡原里人曾
大父諱有才宋廸功郎某州某縣尉大父諱舜夫父諱大
政太學內舍生公少而豪邁讀書輒能評論古昔年十
四五習舉子業自謂取科第如拾芥俄而宋亡國初政
令新懦者多兔窟鳥散公每出入府縣或胥徒徵呼率
明目張膽而言會郡庠正儒籍公則褒衣大帶前列未
幾鄉里盜賊蜂起有司不能制因以機察縻之賊盜據

險高營寨白晝剽劫殺人他日衆忽突入公家公曰吾
與若何冤欣然出揖而導之曰酒肉在此室咸竄走鑰
不可啓請以刀毀之賊喜飲食而去內舍公存時有竊
其山木者訴而杖之至是與賊黨言於其首欲藉報怨
首命左右來呼公公即往以所言問公曰內舍罪竊木
時吾方若干歲內舍死以若干年吾何知首善之曰小
內舍其歸也又未幾招討郭公某提兵來收捕公以詩
見之大喜不數月盡獲公適至幕下縣索地坐數百人

皆將斬之公從容言渠魁脅從在所當辯郭公諾由是
活者甚衆平居朋友相過從必抵掌大笑闊論人有非
輒面折之不隱待奴僕或謔或罵率喜服不怨其文詞
多雄直若不甚經意雖農圃聞之無不曉而味則優遠
號為作者或窮搜冥索所不能到蓋其天性素高如此
也故遠近之求文者踵至晚有重脰之疾杖而後能步
嘗謂諸葛孔明蓋高卧隆中者而功業乃爾苟有用我
亦豈盡腐豎乎故自號為隆卧老人云某年某月以疾

卒生宋咸淳癸丑享年七十娶同邑許氏子男一人曰
夢得女三人長適同里何次適豫章胡次適同里丁初
夢得以陰陽家言權厝傍山至正丙戌始得吉兆於鄉
之北庄以十二月日葬來命銘于李某某公甥也微賤
言不足以重公然則如義何銘曰

孟氏論氣至大至剛士必有此養之日強彼蘊然者一
沮而僵其立則林蕩如空塲惟此吳公磊落軒昂末節
細度畧而弗綱雖則不試肝膽揭張虛此抱負鬱為詞

章如舟春河白波蕩蕩表乃衣冠胡不後亡傍山之殯
屢易星霜茲得吉卜在彼北庄妥爾宜後水清山長

陸氏孺人墓誌銘

孺人諱某姓陸氏世為撫州金谿縣青田里人宋文安
公象山先生九淵其四世祖筭而歸饒州安仁縣松唐
里吳君中立斯賢子二人長謙次恒女一人壻同郡臨
川夏柄孫三人通廸遵至順五年癸酉三月丙子無疾
而卒得壽七十有五謙以元統三年乙亥某月日葬里

中山謂其友李某曰譙之母性靜而和寡言辭平居堂
與間若無人者容止甚安坐立必整先君子年若干棄
二孤家甚貧母儉勤以掌之不為憂但常曰吾為汝家
婦時惟恐得罪舅姑若輩宜自立母為爾先人及外氏
羞謙因得從師百里之外歲時一歸省囊裝蕭然未嘗
一語及也素少疾雖老順輔間潔無唾涕丙寅之歲恒
復卒謙則無所事

闕

得朝夕養而吾母亦不為

人世留矣吾子有同門之好賜一言以刻諸幽則吾母

之美將不隨以死乎某悲其言不敢辭銘曰

生有德血氣治既高年不病死埋斯阡宜孫子

三老材甫桂君墓誌銘

君諱梓字材甫姓桂氏世為饒之安仁縣人曾大父諱伯玉大父諱萬父諱文君幼而機敏不隨常兒嬉狎齟齬從師刻意工字畫稍長從縣曹事法律每居人儔中氣貌軒然常喜讀司馬氏所編資治通鑑對賓客論誦輒聯篇累牘甚習平居事父母甚歡母性嚴苟有怒敕

妻子屏息不敢毫髮違者既而父母相繼卒喪之甚哀
時刀筆尚深刻貪舞君不肯詭隨遂棄去既而家日裕
新其屋廬女弟既嫁疾病而夫貧君使歸醫母曰若居新
妹苟不愈何如對曰委之夫家恐不能生吾手足也寧
能以居之新故為重輕乎已而果安由是居善樂於門
以濟急難歲延明師教其子孫會朝廷興科舉豫章王
公充耘以明經登第復命其幼子從遊於東湖之上所
居當巨石之麓道有欹仄早莫行者蹶傷捐資鑿石畚

土甃之使平人甚便之內附初邑人死於兵者相枕籍
老長信浮屠法歲仲冬率費建大齋龍安寺以為常君
慮不久俾同邑人艾君秀實舍田歲收米一百石以充
費季父不娶無子君養之間遇始生之日必具酒食召
鄰之年相若者共娛樂之八十三而終喪葬之如儀里
人有貧死不能棺者棺之寒不能寢者楮衾之初朝廷
以饒產金募民能淘采者輸金以當其賦稅時有無田
而家則裕願虛輸以免百役歲久而弊貧逃死絕者數

百家而里役代之輸君嘗私憂曰國家之經入何道而
可免按其籍考其例有除賦多而輸金少使輸除相當
則可無虛輸者上不虧國課下足寬民窮然則苟無賢
大夫亦不能行也蘊之而未發會真定王公慶來為尹
遂白而行之皆悅立均金之碑以著尹德而推所從始
則實君有力焉邑自泰定以來賦稅之籍虛詭百端至
正庚寅秋始蘊金公伊克達袞來尹首延君為耆老君
陳賦稅之弊公毅然欲釐正之令民自首俾君董其事

且擇老成厚重以自輔於是首牘盈案無何而公致政人皆惜其事之甚美而徒已於垂成也君嘗構樓數十楹於居西戶牖四開皆茂林古木尚書雒陽楊公聞之為大書秋山二字俾揭之楣至正辛卯四月二十又六日不疾而卒生前至元庚辰春秋七十有二配徐氏子男三人長榮次敏先十五年卒次集女一人適同邑周良孫男九人溥淵灝澄復生馬兒夢祖壽祖顯祖孫女七人長適同邑劉晉次適吳泰次適趙同荷餘尚幼曾

孫男二人華生魯孫曾孫女一人前七日自營其藏於
崇義鄉之三公山八月二十日丙申榮等將奉柩以葬
且來乞銘君長身美鬚髯多言論正不阿故士大夫樂
與之交死之日咸歎曰邑欲復求如斯人其庸可得乎
余謂世之溺沒於刀筆者或肆其志嗜利如饑渴老不
知止而君則幡然於盛壯之年優游于里巷者唯知燕
享之不暇而君之言行事往往有及於物亦可謂自拔
尚義者矣銘曰

林林世間愚智不齊此獨何見出乎等夷子孫蕃衍為家之肥山曰三公既高且奇生所樂者死其安而

高得遠墓誌銘

高深字得遠其先蓋閩人世祖遷撫州臨川縣廣東鄉之洙塘曾祖次儉祖應星宋壽春府下蔡縣尉父一夔登仕郎得遠幼而警敏經史百家言過目輒成誦下至稗官種樹等說靡不涉獵且有能詩聲年三十有七卒時延祐己未五月也娶饒州安仁縣倪氏奉訓大夫銓

之女子二人某某以至治辛酉三月甲申葬陳坡嶺他
日獲與其從子溥交溥示得遠詩數十首讀之淡然有
晉魏風溥因為存言得遠嘗夢遊一古寺中其山水清
絕非若人世者數僧與之倡和出語輒奇覺而識不忘
於是即其鄉某寺之東築別室而扁之曰崇江道院種
竹培菊似欲忘世者其高興率類此存嘆曰甚哉秀而
不實也使假之年長養其所蘊則亦詎可量哉溥復請
追銘其墓以慰之銘曰

其生也豐醲其賦也清沖宜壽而天天乎何夢夢

于曉憲壙誌

代其子作

先君諱希明字友諒曉憲其別號也世為饒州安仁人
先居青山里後徙樓山曾大父某大父某父某先君早
孤卓然植立內外周旋靡有瑕缺性剛決不苟取及晚
年寬衣方屨逍遙閭里間人皆敬其為忠厚人也好佛
氏嘗綉梓印其經以施人又嘗粧飾僧舍佛像助修橋
梁凡可以利濟率為之無吝色至順己巳歲大旱明年

穀價四起先君酌時直之半以糶無錢者假貸之操瓢者輒給之閭里得不饑蓋亦知所自也天歷壬申八月七日乃先君始生之旦為之齋戒追遠不樂明日具燕飲聚長幼極歡越六日及午泊然而逝生於宋德祐癸酉享年六十娶某氏男二人長某次某入龍虎山為道士女一人適同里李某元統甲戌十有一月葬某某葬之日凡親友皆會哭且曰子君資性廉約不事榮寵可以謂之貞矣稱其財以濟人可以謂之惠矣宜私易其

名曰貞惠先生焉某等不孝未能求銘於當世名筆謹述大槩誌諸壙

自書趙氏壙記

後以陰陽家以為不利至某年月日復遷于竹莊西齋之右如

前置

云

趙氏諱安字和卿世為浙西湖州人曾祖某嘗尉饒之安仁因家焉累官至某卒贈金紫光祿大夫祖某通直郎浙西帥府幹辦官父與權前鄉貢進士卿生二十有一歸于我家甚貧無婢奴躬汲爨曰子勿以為意吾能

安也時先君年又高有痼疾日須藥物食飲不時而余
又假館於人以為業且賓客時至隨有無為具一以諉
卿唯唯未嘗拂吾意也寒暑衣余子女四人皆出朝暮
紉績凡二十餘年久之家粗給或有酒肉必先尊者次
及客次及子女已衣裳隨時舊新補綴歲蚕織或人遺
束帛悉以資嫁娶平居寡言笑旬朔不出戶庭然身疾
病濱於死者數四每曰吾必先子逝矣元統二年甲戌正
月丙午卒生前癸未四月二十三日享年五十有二後

三年為至元丙子十一月乙酉始克祔于合掌塘姑氏之墓之側虛其右以俟余也子男三人曰卓曰章妾薛氏生子一人曰多多孫男一人曰景星女二適餘干柴觀及同邑逢復云


湯氏孺人墓誌銘

至元丙子春三月丙子逢以謙母湯氏孺人卒得年六十有七將以十月丙戌葬繆家塘命銘於存存之女實為孺人冢孫復婦義不得辭謹序而銘之孺人諱某字

某世為饒州安仁人曾祖元祖元齡父懋字昭甫淳祐
間鄉貢進士從高祖漢工部尚書孺人笄而歸同邑逢
君應瑞時國初搶攘君應門不暇給孺人力垂績督播
種事舅姑食朝夕上得盡乃喜生以謙而君卒則益自
勞苦以謙稍長即俾從師百里外既壯為之聘孫男女
七人有嫁娶者而孺人老矣然未始自倦怠也由是家
用粗饒且性甚敏慧其子孫得親友簡牘遇草書或卒
不能通其旨者則詰上下文云云良久曰其言蓋如此

也已而果然又強記自幼聞人讀古詩文輒成誦終身不忘父母老兄復不娶皆養於家凡三十餘年死葬之以從兄之子後之歲時洒掃其塋域必求其所嗜者而薦之未嘗不流涕也父兄夫平時手書雖片紙一字藏之甚謹初逢氏五世祖汝霖事宋高宗累官至總領江西湖廣荆襄六道漕運進階金紫光祿大夫高宗嘗賜手詔二世築樓以守之歲久而燬至是孺人克新廣其室命樹其刻於前榮之右曰逢宗不振久矣將使後之

人世世毋忘為疇昔仕族者也卒之日又謂以謙曰吾
死有憾者吾父所葬地常病其卑且洳也欲遷之而未
能今則已矣其為我大書深刻於石而立之曰湯公昭
甫之墓庶乎雖久而不湮也嗟乎孰謂女子從人者也
老且死猶眷眷於其親其不謂之天常甚厚者歟宜為
銘銘曰
婦也夫子宜之女也父母寧之母也子孫成之藏也李
存銘之



侯菴集卷二十五